

# MODIMO KE MOHLATHOLLI

## WA GAGWE MONG



Tate wa rena wa Legodimong, Lentšu le le tšwago go Wena le tla bolela go feta ka moka monna nako efe goba efe a ka kgonago go dira goba go bolela, ka baka la gore batho ba letetše go bona Wena. Gomme re leboga Wena ka baka la gore fao go na le bao ba lego ka tlase ga tetelo, ba letetše selo se sengwe gore se direge. Gomme ge batho ba nyoretšwe selo se sengwe, botebo bo bitša Botebo, fao go swanetše go ba Botebo bjo bo arabago pitšo. Ke ka baka leo re lego fa bošegong bjo, ka baka la gore e be e le godimo ga dipelo tša badiredi, le batho, go re bitša mmogo go Go kgopela go lebelelwa ka botho le ditšhegofatšo, re dumela gore O tla fodiša balwetši le go phološa balahlegi, gomme o tla dira go bonagatša Lentšu la Gago.

<sup>2</sup> Gomme re a rapela, Tate wa Legodimong, gore O tla fa se go rena ge re letetše ka go kokobela go Wena, bošego ka morago ga bošego. A nke go be ye bjalo tšho—tšhologo ya Moya wo Mokgethwa, gomme a nke motho yo mongwe le yo mongwe e be sefofu go eng kapa eng gape yeo e lego tikologong ya bona ntle le Modimo. A nke go be selo se segolo se se bjalo go tšwa magareng ga batho, ba ba nyoretšwego Modimo, go fihla fao go etla tsošetšo go kgabola naga fa gomme kereke ye nngwe le ye nngwe e tla tlala la go falala ka batho, badiradibe ba llera Modimo gore a be le mogau, gomme—gomme Moya wo Mokgethwa o fodiša batho, o dira digole di sepele, gomme o tsoše bahu, gomme o e fa dilo tše tšeo di tshephišitšwego ka Lentšung la Gago.

<sup>3</sup> Etna, Morena Jesu, gomme o phethagatše tshephišo ya Gago. Etna go rena bošegong bjo. Re a dumela gore O yo a swanago maabane, lehono, le ka gosafelego, gore ditshephišo tša Gago ga di kgone go feila. Mmogo magodimo le lefase di tla feila eupša Lentšu la Gago le ka se feile. A nke kwišišo ya rena e bulege. A nke Moya wo Mokgethwa o tle gomme o bee mobu o lokišitšwego. A nke kwišišo ya rena e bulegele Moya le maatla a Modimo bošegong bjo, gore A bonagatše Mantšu a Gagwe a a tshephišitšwego ka rena. Ka gore re se kgopela ka la Jesu Leina. Amene.

<sup>4</sup> Bjale, bošegong bjo, lena ba le bogetšego temathero, a re buleng Beibele go Puku ya Petro wa Bobedi, gomme re thome ka 15 temana, feela bjalo ka tsela ya go bolela ka Lengwalo dinakwana di se kae.

*Go feta fao ke tla phegelela gore le tle le kgone gore ka morago ga go hwa ga ka le be le dilo tše ka mehla kelellong.*

*Ka gore ga re latele tše di hueditšwego ka maano, dinonwane, ge re le tsebiša maatla le go tla ga Morena Jesu Kriste, eupša re be re le dihlatse tše di bonego ka mahlo tša bogolo bja gagwe.*

<sup>5</sup> Ke rata seo, “dihlatse tše di bonego.” E sego nonwane. Re hlatse tša seo re bolelago ka sona.

*Ka gore o amogetše go tšwa go Modimo Tate tlhompho le letago, gomme fa go tlile lentšu le le bjalo go yena go tšwa letagong le le botsebotsebotse, Yo ke Morwa moratwa wa ka, yo Ke kgahlwago ke yena.*

*Gomme lentšu le le tšwago legodimong re le kwele, ge re be re na le yena thabeng ye kgethwa.*

*Re na le gape lentšu le le tiilego go fetiša la seporofeto; leo e lego gore le ka dira gabotse gore le le hlokomele, bjalo ka lebone le le etšago le . . . lefelong la leswiswi, go fihla ge letšatši le esa, gomme naledi ya letšatši e hlaba ka dipelong tša lena:*

*Le tsebe se pele, gore ga go seporofeto sa lengwalo se se nago tlhathollo ya ka thoko.*

*Ka gore seporofeto dinakong tša kgale se be se tle ka thato ya motho: eupša banna ba bakgethwa ba Modimo ba be ba bolela ba išwa ke Moya wo Mokgethwa.*

<sup>6</sup> A nke Morena a oketše ditšhegofatšo tša Gagwe palong ya Lentšu la Gagwe. Bjale, ke ya go tšea se go ba thuto: *Modimo Ke Mohlatholli Wa Gagwe Mong.*

<sup>7</sup> Re phela letšatšing la kgakanego. Re phela letšatšing leo mo monna le mosadi ba sa tsebe go ba dire eng. Selo se sengwe le se sengwe, se—se bonagala se le ka tlhakahlakanong. Selo se sengwe le se sengwe, go bonagala fao go le ditsela tša go fapana tše di kago go lebelelwa. Ke Sathane, a dirago seo.

<sup>8</sup> Bjale, Modimo a ka se kgone go ahlola batho ka toko, ka go loka, ntle le ge fao go le selekane se se itšego seo A swanetšego go ba ahlola ka sona. Gomme Beibele e bolela gore O tla ahlola motho ka moka ka Jesu Kriste, gomme Jesu Kriste ke Lentšu. Ka go Mokgethwa Johane, ya 1 tema, E rile:

*Mathomong go be go le Lentšu, gomme Lentšu o be a le go Modimo, gomme Lentšu e be e le Modimo.*

*Gomme Lentšu a dirwa nama, gomme a dula magareng ga rena, . . .*

<sup>9</sup> Bjale, ka moka se re lego sona lehono ke go pealatša dikgopolo tša Gagwe. Ka go Modimo . . . Peleng O be a bile e

se Modimo, Modimo, re be re ka no Mmitša “yo Motee wa ka Gosafelego.” O be a se Modimo, ka baka la gore lentšu (lentšu la Seisimane) *Modimo* le ra gore “selo sa go direlwa” gomme fao go be go se selo go Mo direla. Ka fao O be a le yo Motee wa ka Gosafelego, wa—wa mmakgonthe Mothopo wa bohlae ka moka. Gomme ka Mothopong wo wa bohlae ka moka fao go be go se na le athomo, molekhulo, go be go se selo, seetša mo gohle, naleli, ngwedi, go se selo gape. Modimo, yo re mo tsebago bjalo ka Modimo, Moya wo mogolo wo o bego o le wa ka Gosafelego (ga se wa ke wa thoma, ga se wa ke wa fela), O be a le fao. Gomme ka go Yena go be go le dikgopolo: e be e le dikgopolo tša go ba Modimo, ka gona dikgopolo tša Gagwe tša go ba Tate, dikgopolo tša go ba Morwa, dikgopolo tša go ba Mophološi, dikgopolo tša go ba Mofodiši. Ka moka dikgopolo tše di be di le ka go Yena. Gomme bjale O . . . Ka moka dilo tše tšeo di tatologilego go tloga nako yeo e no ba dikgopolo tša Gagwe di dirwa go bonagatšwa.

<sup>10</sup> Seo ke se rago, *dikgopolo* e be e le “megopolo” ya Gagwe. Gomme le—*lentšu* ke “mogopolo ge o tšweletšwa.” Gomme ka gona seo se be se le ka monaganong wa Gagwe. Gomme ge A rile, “Fao a go be le,” gomme fao se ile sa ba. “Fao a go be le,” gomme fao sa ba.

<sup>11</sup> Bjale, elelwang, lena Bakriste le be le le megopolo ya Gagwe pele ga ge fao go eba lefase. Gomme ke lena ponagatšo ya go nagana ga Gagwe. Pele ga ge fao go eba le ge e ka ba lefase, le be le le ka go Kriste, (amene) ka go Modimo mathomong. Seo se a go dira, gona, le a bona, balatedi ba Gagwe. Gomme selo sohle ke Modimo, ka Boyena, a ipolela ka Boyena go swarega gore A tle a kgone go kgwathega, go bonwa, le—le go ya pele. Gomme seo ke se Modimo a lego sona, selo sohle.

<sup>12</sup> Batho ba re, “Tlhathollo . . .” Ke be ke bolela fa e sego botelele go fetile ka kopanong, monna a re go nna, a re, “Ngwanešu Branham, o na le tlhathollo ye e fošagetšego. Ga o hlatholle Seo ka nepagalo.”

<sup>13</sup> Bjale, re kwa . . . Ba ya go Momethodist, gomme ba re “Mobaptist ga a hlatholle ka go nepagala.” Mobaptist o re, “Mapentecost ga a dire.” Mopentecost o bolela gore “Ma—Maoneness ga ba dire.” Maoneness ba re, “Maassemblies ga ba dire.” Gomme yo mongwe le yo mongwe o re yo mongwe ga a dire.

<sup>14</sup> Modimo ke Mohlatholli wa Gagwe Mong! Ga a nyake yo a itšego go Mo hlathollela. O dira go hlatholla ga Gagwe Mong. Ke mang monna yoo a ka kgonago go hlatholla Modimo? Modimo ke Mohlatholli wa Gagwe Mong.

<sup>15</sup> Bjale, Petro ge a bolela fa, re hwetša gore mathomong ge Modimo a rile, “Fao a go be le seetša,” gomme fao gwa ba le seetša, yeo ke tlhathollo ya yona. Ge Modimo a boletše eng

kapa eng gomme sa bonagatšwa, gona seo ke tlhathollo ya Modimo ya gore Lentšu la Gagwe le nepagetše. Le a bona? Ge A rile, “Fao a go be seetša,” seo se be se le ka monaganong wa Gagwe la mathomo pele fao go be go ka ba selo se se bjalo ka seetša. Ge A rile, “Fao a go be seetša,” seetša sa tabogela ka magodimong, seo ke tlhathollo. Ga go le yo motee a swanetšego go hlatholla seo, ka gore Modimo o boletše bjalo gomme fao se bile gona. Ge Modimo a bolela gomme sa bonagatšwa, yeo ke tlhathollo ya Lentšu la Gagwe. Ke ka baka la eng banna ba sa bone seo? Ke ka baka la eng batho ba sa bone seo?

<sup>16</sup> Ge Modimo a dira tshepišo gomme Modimo a re... Ma—mathomong, ka go Genesi, O abetše Lentšu la Gagwe go lebaka le lengwe le le lengwe ge Le etla go theoga go tloga mathomong go fihla mafelelong. Gomme, go theoga go kgabola mabaka a, kereke ya lefase e dirile ka moka dilo tše go tswakana le ditšo, le go ya pele, gomme Modimo ka mehla o romela lefelong la tiragalo, go theoga go kgabola Tastamente ye Tala le ye Mpsha, baporofeta! Gomme Lentšu la Morena le tla go moporofeta. Gomme Le e dira bjang? Le bonagatša Lentšu la Modimo. Ponagatšo ya Modimo, ye e bolelago ge eba ke go nepagalo goba go fošagala. Ga go le yo motee a swanetšego go Le hlatholla, Lentšu le itlhatholla ka Bolona. Modimo o e tshepišitše gomme fao e a direga!

<sup>17</sup> Ke botse bofe e bo dirago go bolela eng kapa eng gape ka Lona? Ke mang motho wa go tlala sebe yo a ka lekago go bolela (ge Modimo a dirile tshephišo gomme Modimo o a e dira) gore tlhathollo yeo e fošagetše? Yoo ke Modimo ka Boyena a dira tlhathollo ya Gagwe Mong, a hlatholla. Ga a nyake mang kapa mang go Mo hlatholla, O hlatholla ka Boyena ka go bonagatša seo A se tshephišitšego gore O tla se dira.

<sup>18</sup> Oo, ge kereke e ka kgona feela go bona seo gomme ya bona ditshephišo tšeo di abetšwego lebaka le lengwe le le lengwe! Ka moka a mangwe mabaka, Modimo o rometše lefelong la tiragalo (le go theoga go kgabola mabaka a a šupago a kereke) gomme a bonagatša selo se sengwe le se sengwe se A tshephišitšego go se dira. Selo se sengwe le se sengwe, fao ga go na le selo se setee se tlogetšwego se se sa dirwa. Tlwa! Seo A boletšego gore O tla se dira, seo O se dirile.

<sup>19</sup> Ka baka la gore ge Modimo a boletše, morago kua go Jesaya, O rile, “Kgarebe e tla ima,” gomme e dirile. Bjale, ke mang—ke mang a ka kgonago go hlatholla seo? Modimo o dirile tlhathollo. O rile, “Kgarebe e tla ima,” gomme ya ima. Bjale, ke eng se o...o ka se kgone...Ga go selo se se ka kgonago go bolelwa ka seo, ka gore Modimo o rile o tla dira gomme o dirile. Eupša kereke e be e fufetše kudu nako yeo go e bona. Le a bona, ba be ba na le dikgopolo tša bona beng ka yona. E be e fapane kudu—kudu go feta se ba bego ba se letetše.

20 Petro fa o be a šupa morago, o rile, “Modimo o bonagaditše Kriste ka Lentšu la Gagwe, O rile, ‘Yo ke Morwa moratwa wa Ka.’” Badumedi ba ba be ba eme fao. Gomme Kriste e be e le ponagatšo ya Modimo. Ka mehla O bonagaditše Kriste ka Lentšu la Gagwe, ka baka la gore Kriste ke Lentšu. Ka mehla O a bonagatša.

21 Ge A rile. . .Ka matšatšing a Noage, Kriste o be a le ka go Noage. A le dumela seo? Noage o rile, “E ya go na. Fao go tla ba le pula, lefase le tla fedišwa.” E ile ya na. Seo ga se sa ke se nyaka tlhathollo ye e itšego. E ile ya na ka baka la gore Modimo, ka go Noage, o rile, “E ya go na.” O be a le moporofeta, gomme bohlatse e be e le gore se a se boletšego se tla go phethagala. Ka fao ga ba nyake go hlatholla seo.

22 Ba bangwe ba bona ba ka be, go dikologa, ba rile, “Monna yo ga a tsebe se a boelago ka sona.”

23 Eupša Modimo dinako ka moka o be a tshephiša, “Ge go na le yo motee magareng ga lena yo e lego wa semoya, goba moporofeta, gomme ge se a se boelago se phethagala, gona se kweng.” Seo ke go nepagala, ka baka la gore ke therešo. Se swanetše go ba go ya ka Lentšu. Gomme Noage o be a le go ya ka Lentšu. Ge a porofetile gore e be e eya go na, gomme e ile ya na. Seo ga se sa ke se nyaka tlhathollo ye e itšego ya seo, ka baka la gore e dirile feela seo.

24 Jesaya o rile, “Kgarebe e tla ima,” gomme ya dira. Bjale, seo e be e le sa go makatša seo se sego sa tlwaelega. Ka gore, le a bona, e be e le makgolo a mantši a mengwaga ka morago pele ga ge kgarebe ye e ile ya ima.

25 E be e le selo sa go se tlwaelege go fihla ge monna wa go loka wa leina la Josefa, monna wa gagwe, “e le monna yo a lokilego gomme o be a sa nyake go mo dira mohlala wa phatlalatša. . .” Monna yo wa go loka matšatšing ao, ka fao e be go e na le Josefa ge a be a tlema tshephišo, a beelatša Maria.

26 O be a beeditšwe. Letšatšing leo, go roba yeo, go be go no swana le ge o dirile bootswa. Gomme, go le bjalo, go Josefa, go be go bonagala o ka re Maria o be a leka go mo šomiša go ba seširelo, goba go mo dira go ba kotse ya phošo ya gagwe, ka gore fa o ile a hwetšwa a swanetše go ba mme, a se a nyalwa, a nno tlema tshephišo feela. Boradia bjo bo bjalo ka bjoo, o be a tla thungwa ka maswika go ya lehung; go be go swanetše go ba bjalo, ka molao.

27 Gomme Josefa, monna wa gagwe, e be e le monna yo a lokilego, monna yo a lokilego kudu. O be a dumela Modimo. Gomme o ile a mo lebelela ka ale a lerato, a magolo a boleta mahlo, gomme a re, “Josefa, Gabariele Morongwamogolo o nketetše gomme o mpoeditše gore ke ya go ima, ke sa tsebe monna.”

28 Bjale, ge Josefa a ka be a ile a no lebelela morago ka Lengwalong, moporofeta o rile o be a eya go dira seo! E be e le Modimo a nnoši a hlatholla Lentšu la Gagwe Mong! Le a bona? Eupša e be e le se se sego sa tlwaelega kudu.

29 Seo ke se e lego bothata ka go lebaka le lengwe le le lengwe. Lentšu la Modimo ke le e sego la gabo batho; Ke le le sego la tlwaelega kudu. Modimo ka mehla o dira se se sego sa tlwaelega. Ke se se sego sa tlwaelega mo gohle fao Modimo a lego. Ke kgahlanong le ditshepedišo tša lefase, ka baka la gore ba na le dilo ka tsela ye ba naganago gore di swanetše go ba. Eupša Modimo o tla ka gare gomme o dira tše di sego tša tlwaelega.

30 “Go be go ka kgonega bjang gore kgarebe ye e ime?” O be a botega, o ile a nyaka Modimo ka yona.

31 Gomme ka gona Modimo a bolela le yena torong, gomme a re, “Josefa, wena morwa wa Dafida, o seke wa boifa go tšeela go wena Maria mosadi wa gago, ka gore seo se imilwego ka go yena ke sa Moya wo Mokgethwa. Modimo o mo apešitše ka morithi. Seo ke se se e dirilego.”

32 A le kile la ela hloko ka fa Modimo a šomanego le Josefa fao? Ka tsela ya bobedi, ka tsela ya toro. Bjale, re a tseba fao go na le ditoro, re dumela ditorong. Ke dumela ditorong. Ke bile. . . Modimo ka mehla o be a šomana le batho ka ditoro. Eupša ditoro ke tša bobedi, le a bona, e ka kgona go nepagala goba go fošagala ntle le ge e hlathollwa. Eupša ga se a ke a nyaka tlhathollo ye e itšego. E be e le Modimo ka Boyena a bolela thwi go Josefa, ka baka la gore go be go se moporofeta ka nageng ka wona matšatši ao go hlatholla. Fao go be go se gwa ke go e ba moporofeta lebaka la makgolonne a mengwaga. Ka fao sa go latela se sekaonekaone, seo Modimo a bego a ka hlokomela go ba gabotse, morero wa morwa wa Gagwe Mong, e bile go bolela le Josefa ka toro le gona ntle le tlhathollo. O rile, “Mosadi o a rereša. Selo seo se Sekgethwa se se imilwego ka go yena ke Morwa wa Modimo.” O be a sa nyake tlhathollo ye e itšego.

33 Modimo o dira tlhathollo ya Gagwe Mong go ye e botegago, tše di hlokofetšego dipelo, banna le basadi ba ba lebelelago godimo ga—ga selo seo e lego sa sephiri, ge o botega gomme o hlokofetše gomme o tla dumela, Modimo o na le tsela ya go e hlatholla go wena. Sa pele, hwetša ge eba ke tshephišo. Ge Josefa a ka be a ile a no ya morago gomme a tloga go tšwa go ditšo gomme a ya morago go Beibele, gomme a hwetša, Jesaya o rile o be a eya go dira seo.

34 Gomme dilo tše di boletšwego, le matswalo a Gagwe, gomme le ka moka ka yona di boletšwe ke Mangwalo, “ka baporofeta ba bakgethwa,” bjalo ka ge Petro a boletše. Gomme ga go motho yo a nago le tokelo ya go bea tlhathollo ya sephiri go lona. E no ba tlwa se Modimo a boletšego gore se tla direga.

O be a le ponagatšo ya Lentšu la Modimo le le tshephišitšwego letšatšing leo. Modimo o le boletše, ka fao le be le le fao. Seo se a e rarolla.

<sup>35</sup> Jesu o rile. . . Ge A be a le lefaseng, ge ba be ba sa kwišiše bodiredi bja Gagwe, e be e le bjo bogolo kudu, bja ponagalo, (ga se ba ke ba kgona), tiragalo, ke ra gore. Ga se ba ke ba kgona go Mo kwišiša. O rile, “Phetlang Mangwalo!” (Ke a holofela ga ke le thibe ditsebe ntle fao, mothunyo ka go seo.) “Phetlang Mangwalo, ka gore ka go Wona le nagana gore le na le Bophelo bjo Bosafelego, gomme ke Wona a pakago ka Nna.” Le a bona? “Ke Wona a le botšago gore Ke nna Mang.”

<sup>36</sup> Le a bona, Modimo o abetše Lentšu. Letšatši leo le be le swanetše go ba ponagatšo ya Modimo, Modimo (Emmanuel) le rena, “Leina la Gagwe le tla bitšwa Matete, Moeletši, Kgoši ya Khutšo, Modimo yo Maatla, Tate wa Gosafelego. Gomme Leina la Gagwe le tla bitšwa *Emmanuel*, ‘Modimo o na le rena.’” Modimo o be a le ka go Dafida. Modimo o be a le ka go Moshe. Modimo! Yoo e be e le Modimo tsela go kgabola, a iponagatša ka Boyena go lebaka leo. Eupša lebaka le, “Kgarebe e tla ima gomme e tla tliša pele Morwa, gomme O tla ba Modimo a na le rena.”

<sup>37</sup> Seo ke se ba Mmapoletšego sona, go itira Modimo ka Boyena, gomme gape le go roba Sabata. O be a le—O be a le Modimo ka godimo ga Sabata, gomme O be a le Modimo. Gomme O be a no se be monna wa go tlwaelega goba moporofeta wa go tlwaelega (eupša O be a le Monna wa go tlwaelega le Moporofeta), eupša O be a le Modimo-Moporofeta. Gomme O be a le phethagatšo ya Lentšu, tlwa se Modimo a boletšego gore O be a tla se dira. O rile, “Ke mang wa lena a ka Nkahlolago ka sebe? Phetlang Mangwalo! Ka go wona le nagana gore le na le Bophelo bjo Bosafelego, gomme ke wona a pakago ka Nna.” Eupša ditšo tša bona, ba be ba phela ka leutung la lebaka le lengwe.

<sup>38</sup> Bjalo ka ge ke be ke rera dibeke di se kae tša go feta, “Go *phela leutung*.” Leutu ke “ponagatšo ya bofora,” letšatši le iponagatša ka bolona, gomme ke bofora. Gomme leutu lefe kapa lefe la lebaka le lengwe ke ponagatšo ya bofora. Batho ka mehla ba sepela ka go selo se sengwe se se diregilego mengwaga ya go feta. Maluther ba sepela ka leutung la Boluther. Seetša sa letšatši sa Luther se be se lokile ka letšatšing la gagwe; Wesley o be a lokile ka letšatšing la gagwe, Bopentecost bo be bo lokile ka letšatšing la bjona. Re ya godimo ga lelere, re phela ka lebakeng le lengwe! Re ya pele, pele, re ka se kgone go tšwela pele re lebelela morago.

<sup>39</sup> Ge re itira ka borena go iketla ka dilong tše, re nagana gore re na le yona ka moka e dirilwe, re ba le ditšo tša rena diphuthegong; gomme seo se be se le gabotse ka moka go letšatši leo, eupša re šutha go ya pele! Phetlang Mangwalo gomme le bone se se tshephišitšwego lehono, ka gona re tla tseba fao re lego gona, gona re tla kgona go bolela fao re emego.

<sup>40</sup> Luther; le be le ka kgona go lebelela ka Lengwalong gomme la bona ka go lela—ka go lela la Sardis lebaka, le ka kgona go bona tlwa se se bego se tshephišitšwe. Lebelelang gore ke mohuta mang wa monamedi yo a yago pele, lebelelang gore ke eng se sa go ya go mo gahlanetša, tlwa, “bohlale bja motho,” tsošološo. Hlokomela Wesley, le go ya pele. Ge e etla tlase ka go lebaka la Pentecost, gomme tlase go kgabola lebaka leo, hlokomela ka fao e sepetšego ka gona. Lebelelang Mangwalo gomme le bone fao re lego gona. Ke ka lebaka leo Jesu a rilego, “Phetlang Mangwalo!”

<sup>41</sup> Bonang fao re lego gona! Ke a dumela re mo go Tleng ga Morwa wa Modimo thwi bjale. Ke a dumela re mo lebakeng la—la yona iri fao A ka tšwelelago nako efe kapa efe. Ke a dumela Mangwalo a bega seo, gore re diiring tša mafelelo tša historiya lefase le. Ke kgona go bona dilo ge di tšea lebopo. Bonang Khantshele ye ya Mohlakanelwa e hlahlela dikereke ka moka ka go yona, go ya ka go leswao la sebata. Gomme bonang Mmušo wa Roma le se o se dirago, le ka moka tše dingwe tša tšona. Di boneng ge di etla mmogo, di tswalella Seetša ka ntle, di tswalella Ebangedi. Yo mongwe le yo mongwe o swanetše gore a be wa wona gomme o sepele ka dietšeng tša bona goba o ka se sepele le gannyane. Le a bona, re nakong ya bofelo. Fao ga go selo se se re šaletšego ge e se go itshwarelela go Modimo le go dumela Lentšu la Gagwe. Lentšu ka mehla le nepile.

<sup>42</sup> Ka lebakeng la kereke ya Laodikia, leo e bile lebaka la kereke le nnoši, go wona ka moka, leo Kriste a ilego a bewa ka ntle ga kereke. O be a le ka ntle, a kokota. Na go diregile eng? Khantshele ye ya Mohlakanelwa ke ye e yago go Mmea ka ntle. Beibele e boletše gore O be a swanetše go ba ka ntle, gomme O gona. E tswaleletše eng ka ntle? Lentšu. Gomme Ke Lentšu, ka mehla O bile Lentšu, gomme O sa le Lentšu bošegong bjo! Ke Lentšu.

<sup>43</sup> Beibele e rile, “Lentšu ke le le bogalegale, la maatla kudu go feta tšhoša ya magale-mabedi.” Baheberu, ya 4 tema, “molekodi wa dikgopolo le maikemišetšo a pelo.” Lentšu le be le le! Nkabe ba ile ba tseba gore O be a le Mang ge Jesu a boletše seo ka letšatšing leo.

<sup>44</sup> Bogela se A se dirilego. Letšatši le lengwe O be a eme fale, mathomo a go thoma ga bodiredi bja Gagwe. Fao go bile monna yo a go tla go Yena, ka leina la Simone, Simone Petro. Gomme ge Petro a lebelela godimo ga Gagwe gomme—gomme a Mmona, Jesu o rile go yena, “Leina la gago ke Simone gomme o morwa wa Jona.” (O swanetše go be a tsebile gore Moshe o rile, “Morena Modimo wa lena o tla tsoša Moporofeta yo a swanago le nna, gomme Yena le swanetše gore le mo kwe.”) Gomme fa go be go le Monna yo a sego a ke a mmona ka bophelong bja gagwe, a re, “Leina la gago ke Simone gomme ke wena morwa wa Jona.” Ka baka la eng, o ile a tseba thwi go tloga nako yeo gore seo se ka se kgone gape. . . Ba be ba se



ba ke ba e ba le moporofeta lebaka la mengwaga ye makgolo, gomme fa go be go na le Monna a mmotša gore o be a le mang. Ga go makatše o ile a kgona go e amogela!

<sup>45</sup> Filipi, ka nako yeo, o ile a ya gomme—gomme a hwetša Nathanaele ka fase ga mohlare, gomme a mo tliša morago go Jesu. Jesu a re, “Bonang Moisraele yo ka go yena go se nago bofora.”

A re, “Rabi, a O ntsebile neng?”

<sup>46</sup> A re, “Pele Filipi a go bitša, ge o be o le ka fase ga mohlare, Ke go bone.”

<sup>47</sup> A re, “Rabi, Wena o Morwa wa Modimo! O Kgoši ya Israele.” O be a tseba e be e le! Eng? Ga se ya ke ya nyaka tlhathollo ye e itšego, Jehofa o boletše seo!

<sup>48</sup> Fao go be go eme fao ba ba bego ba sa e dumele. Ba ile ba re, “Monna yo ke Beletsebubu. O na—O na le mohuta woo o itšego wa bofora A o gogago. Ke—Ke mmolela-mahlatse, goba selo se sengwe.”

<sup>49</sup> Jesu o ile a ba lebelela, gomme a re, “Ka baka la eng, ge le bolela seo kgahlanong le Morwa wa motho, se tla lebalelwa go lena. Eupša ge Moya wo Mokgethwa o etla go dira selo se se swanago, go bolela kgahlanong le Woo, e ka se tsoge e lebaletšwe lena, lefaseng le goba lefase le le tlogo.” O be a porofeta ka letšatši la rena, letšatši le re swanetšego go le bona. Ka gore O a swana maabane, lehono, le ka gosafelego.

Elelwang, e be e le Jesu Kriste yo a bego a le ka go Moshe.

<sup>50</sup> E be e le Jesu Kriste yo a bego a le ka go Dafida. Ge Dafida, morwa wa...Dafida o ile a ya godimo ga thaba, e le kgoši ye e gannwego, gomme a llela Jerusalema, seo e be e se selo ge e se Kriste ka go yena. Mengwaga ye e ka bago makgolo a seswai ka morago, Morwa wa Dafida o ile a dula godimo ga Thaba ya Mehlgare gomme a lebelela tlase godimo ga Jerusalema gomme a lla, gomme a re, “Jerusalema, Jerusalema, ke gaka fao Ke bego ke go alamela bjalo ka kgogo ge e dira go mantswienyana a yona, eupša ga se wa nyaka!”

<sup>51</sup> Ge Josefa a le ka kgolegong, yoo e be e le Jesu. Ge a be a rekišwa gabotse ka e ka ba diripana tše masometharo tša silibere, yoo e be e le Jesu. Ge a dirwa monna wa Potifaro, yoo e be e le Jesu. Ge a dula ka letsogong la go ja la Farao. Gomme le ge a tloga, yo mongwe le yo mongwe... phalafala e a lla, gomme yo mongwe le yo mongwe o be a swanetše ke go koba letolo, yoo e be e le Jesu. Ga go motho yo a bego a kgona go tla go Farao ge e se—ge e se ka Josefa; ga go motho yo a kgonago go tla go Modimo, ge e se feela ka Jesu. E be e le Jesu, Lentšu le le porofetilwego le phethagatšwa, le bolela ka merithi le diswantšho.

52 Ge Jesu a be a le mo lefaseng, O dirile selo se se swanago se baporofeta ba se dirilego, ke ka baka leo ba tsebilego gore O be a le ponagatšo ya Modimo ya Lentšu la Gagwe. Le be le sa nyake go hlathollwa.

53 Ge Nathanaele a bona se, o ile a wela fase, a re, “Wena o Kgoši ya Israele, Morwa wa Modimo, Kgoši ya Israele. Re A go tseba, ga go motho yo a bego a ka kgonago go dira se.”

54 Nikodemo o tlile e le bošego, a bolela selo se se swanago sa Bafarasei. Eupša, le a bona, ba be ba kgokilwe godimo kudu ka go Khantsele ya Mohlakanelwa ya bona go fihla ge ba sa kgone go Le amogela. O ile a hlagiša seo ba se boletšego, a re, “Rabi, rena...” Ke mang “rena”? Khantsele ya bona! “Re a tseba gore Wena o thitšhere ye e tšwago go Modimo, ka baka la gore ga go motho yo a ka kgonago go dira dilo tše ntle le ge Modimo a na le Yena.” Ba ile ba Le lemoga, ba ile ba tseba E be e le lona, eupša ba be ba kgokilwe godimo ga yona.

55 Gomme Modimo, mo mengwageng ye masomenne ya go feta, o ile a šišinya setšhaba se ka kolobetšo ya Moya wo Mokgethwa, gomme banna le basadi ba sa le ka ntle ga Wona ka baka la gore ba kgokilwe ka go selo se se swanago, go phela ka leutung le la letšatši le lengwe. Na bothata ke eng? Yo mongwe le yo mongwe o nyaka go ba Momethodist, Mobaptist, Mopresbyterian, Moluther, goba selo se sengwe. Le a bona, ke leutu.

56 Ba be ba phela ka leutung la letšatši la Moshe. Na o rileng? O rile... Ba rile, “Rena re barutiwa ba Moshe.”

57 A re, “Ge nkabe le tsebile Moshe, nkabe le Ntsebile. Moshe o ngwadile ka Nna!”

58 Ge nkabe le tsebile Luther, nkabe le tseba lebaka le! Ge nkabe le tsebile Methodist, nkabe le tseba lebaka le! Ka gore Kriste o ngwadile ka lebaka le! Mantšu a a phethagatšwago a swanetše go phethagatšwa mo lebakeng le. Ga Le nyake yo mongwe go Le hlatholla, Modimo o dira tlhathollo ya Gagwe Mong. Modimo o hlatholla ka Boyena, ka baka la gore ke yena A nnoši yo Motee yo a ka kgonago go Le hlatholla. Ditshephišo tša Modimo ka moka di hlatsela se A se boletšego, gomme seo ke tlhathollo.

59 Bjale, Jesu, (go boloka nako), Jesu o rile, ka go Mokgethwa Johane, ya 14 tema, ya 12 temana, “Yo a dumelago go Nna, mediro ye Ke e dirago o tla e dira le yena.” A O e boletše? Seo ke therešo. Seo ga se nyake go hlathollwa mo go itšego. Ge yo mongwe a dira mošomo woo, yoo ke Modimo. Ka nnete!

60 O boletše gape ka kua, “Bjalo ka ge go bile bjalo matšatšing a Loto, ka fao go tla ba bjalo ka go tlang ga Morwa wa motho.” Jesu o boletše seo. A O se boletše? Ka nnete, O se boletše! Seo ga se nyake go hlathollwa.

Ba re, “Go lokile, seo se be se e ra...”

61 Se be se e ra feela tlwa seo A se boletšego! “Bjalo ka ge go bile bjalo matšatšing a Loto, ka fao go tla ba bjalo ka go tlang ga Morwa wa motho.” Go reng ka matšatšing a Loto? A re yeng morago lebakana feela, re hwetšeng gore ba be ba dira eng.

62 Go be go le mehuta ye meraro ya batho matšatšing a Loto: modumedi, modumedi wa maitirelo, le yo e sego modumedi. Se ka sehlopheng se sengwe le se sengwe, selo se se swanago.

Re hwetša gore Basodoma e be e se badumedi.

Loto e be e le modumedi wa maitirelo.

63 Abraham e be e le modumedi. E be e le yena yo kgwerano ya go tlišwa go yena. Ke yena yo a bego a lebeletše morwa wa tshephišo. Ke yena yo a bego a e letetše. Amene. (Ga ke re “ameneng” nna mong. *Amene* e ra gore “A go be bjalo!”) Gomme seo ke therešo. Abraham o be a se ka Sodoma. Abraham o be a le godimo ka ntle ga Sodoma. Ke seswantšho sa Kereke ya semoya lehono.

64 Loto ke seswantšho sa kereke ya leina tlase ka Sodoma go le bjalo. Hlokomelang, Beibele e boletše gore, “Dibe tša Sodoma di be di kgopiša soulo ya gagwe ya go loka letšatši ka letšatši.” Ke ka baka la eng a be a sa be le tšhika go lekanela go ema ntle kgahlanong le sona? Fao go na le banna ba bantši ba go loka ba ba dutšego ka kerekeng lehono, ba lebeletšego ka ntle gomme ba bona basadi ba apere dišothi le banna ba dira dilo tše, gomme maloko a bona ba eya, go bapala kolofa ka Lamorena, le diphathi tša phikiniki, le go thutha le dilo, go na le gore ba ye kerekeng. Ba dula gae ka Laboraro bošego, ba bogela thelebišene, go na le gore ba ye kerekeng. Ba kwa o ka re ba ka bolela selo se sengwe ka yona, eupša lekgotla le tla ba bea ka ntle. Na molato ke eng? Ke Loto gape, o lebeletše ka ntle ga lefasetere gomme o bona sebe, gomme o boifa go bitša sebe “sebe”!

65 Abraham o be a se ka tlhakahlakanong ya bona, o be a le ka ntle ga yona. O be a le mohuta wa Kereke ya semoya. Bjale hlokomelang se se diragilego feela ka nako ya bofelo, feela pele mollo o e wa. Gomme bao e be e le Bantle. O apešitše ka morithi pele mollo o wela lefase la Bantle lehono, ge mebušo e tla thubja gomme ya tšhungwa. “Magodimo a tla swa,” go rialo Morena, “gomme a tla swa ka phišo ya godimo.” Woo e be e le morithi wa wona.

66 Bjale a nke re ba bogeleng. Abraham šo o šetše a le ka ntle, e sego ka Sodoma, o be a le ka ntle ga Sodoma. Loto o be a sa le ka Sodoma.

67 Selo sa go se tlwaelege, mosong wo motee wa go fiša, go bapela e ka ba iri ya lesometee e swanetše go ba e be e le yona, o ile a bona banna ba bararo ba etla, banna ba ba tlwaelegilego, ba sepela go theoga ka tsela, mokgotha. Abraham o be a dutše ka tlase ga moouku, a ikhutšitše ka

boyena. O be a bile ka ntle, mohlomongwe le mehlape mosong woo, a tla ka gare, e ka ba nako ya sekgalela. Gomme a bona banna ba bararo ba etla. Gomme fao go be go le selo se sengwe ka banna bao, seo, se bego se letša tlelokwana. Oo, nna!

<sup>68</sup> Fao ka mehla go na le selo se sengwe ka Modimo, ge Se etla magareng ga batho, Se letša tlelokwana. Ba a E tseba. Fao go na le selo se sengwe se se ba botšago, go na le go hlatsela fao.

<sup>69</sup> Abraham a kitima ka pela, gomme a re, “Morena wa ka, etla ka gare gomme a nke ke hwetše meetse a mannyane, ke a ge gomme ke hlapiše maoto a Gago, gomme ke Go fe lerathana la borotho, gomme ka gona O kgone go ya ka tsela ya Gago.” Ka fao a retologela ka thoko. A kitimela mohlaping gomme a tšea namane gomme a e bolaya, a dira gore mohlanka a e lokiše. A ya ka tenteng, tlase fase ga gagwe, gomme a botša Sarah gore a dube folouru, a dira se sengwe, goba bupi, a dira borotho, gomme a dira dikuku sebešong. A di tliša ntle gomme a sola. Ge a sa dutše fao, a eja, ba ile ba thoma go lemoga, Monna yo o be a tšwela pele a lebeletše tlase thokong ya Sodoma. Gomme A re. . .

<sup>70</sup> Ba babedi ba bona, elelwang, ba ile ba ya Sodoma. Ba babedi ba ile ba ya Sodoma. Ka kgopelo o seke wa lahlegelwa ke se. Ke bolella go seo Jesu a se boletšego. Ba babedi ba bona ba ile ba ya Sodoma go ntšhetša Loto ntle le seo se bego se loketše go tšwela ntle kua. Gomme bona ba babedi ba ilego tlase kua, ba ile tlase gomme ba rera. (Gomme fao go bile yo Motee yo a go šala morago le Abraham. Ela hloko leswao le A le dirilego.) Ba be ba na le leswao tlase kua, fao go be go le. . . Basodoma ba ile ba itiwa ka bofofu. Go rera Ebangedi ka mehla go foufatša yo e sego modumedi. Gomme ela hloko se se bo dirilego.

<sup>71</sup> Bjale, fao go na le yo Motee a emego morago fa gomme a dira leswao pele ga Abraham.

<sup>72</sup> Bjale, a le kile la ela hloko, rahistori yo mongwe, o latela Mangwalo, a latela histori, fao ga se gwa ke gwa ba nako ka go mabaka a kereke fao monna a kilego a ya go dikereke tša go tonya ka ntle kua lefaseng, ka ntle kua ka dikerekeng tša maina, fao ga se gwa ke gwa ba monna yo leina la gagwe le felellago bjalo ka Abraham, h-a-m, peleng. Eupša lehono ba na le yo motee, G-r-a-h-a-m. Seo ke therešo. A eya tlase kua, go ba biletša ka ntle. O dira mošomo wa go makatša ka yona. Graham, Billy Graham, mohlanka wa Modimo ka ntle kua magareng ga dikereke tša maina, boradipolotiki, le go ya pele, a e šilaganya.

<sup>73</sup> Letšatši le lengwe ge ba be ba mo nyaka gore a phenkgišanele Bophorisitente, o ile a ganana le yeo a tiile. Modimo, mo šegofaletše seo. Ka baka la eng, tšona dikhamphane tša wisiki, ga se tša ke tša tla motheong wa

mathomo bjalo ka ge go be go swanetše go ba. Di be di tla šomiša dibilione tša ditolara, ka baka la gore o be a tla be a di beile ntle ka mokgwa wo mongwe, dikhamphane tseo tša disekerete le dilo ka mokgwa woo. Le a bona, o ka ntle kua bjalo ka motseta wa Modimo go Basodoma. Seo ke tlwa.

<sup>74</sup> Eupša elelwang, fao go be go le yo Motee yo ilego a dula godimo kua le Abraham, Monna yo mongwe gape, e sego bona ba babedi ba ba go ya tlase kua bjalo ka baebangedi ba sebjalebja ba ba ilego tlase kua go ya go rera. Elang hloko, fao go bile yo Motee yo a go dula godimo kua. Ba babedi ba ile tlase ka tsela *yela*, gomme yo Motee a dula *fa* le Abraham. Gomme yo Motee yo a go dula le Abraham o mo fa leswao.

<sup>75</sup> Bjale hlokomela, leina la gagwe e be e le “Abram” gomme mosadi wa gagwe e be e le “Sarai,” letšatši goba a mabedi feela pele ga fao. Modimo o ile a tšwelela go yena gomme a mmošša, “Ke fetola leina la gago go tloga go Abram go ya go Abraham.” (Le a bona, G-r-a-h-a-m ke ditlhaka tše tshela, motho.) Eupša A-b-r-a-h-a-m ke tše šupa, ditlhaka tše šupa; h-a-m, le felela ka h-a-m.

<sup>76</sup> Bjale, godimo fa ka Kerekeng ya semoya, fao go be go le yo Motee fao go Abraham, gomme ela hloko se A se boletšego. O rile, “Abraham,” (e sego “Abram”) “Abraham, o kae mosadi wa gago” (e sego “S-a-r-r-a”) “S-a-r-a-h? O kae mosadi wa gago Sarah?”

<sup>77</sup> Hlokomela se a se boletšego, “O ka tenteng ka morago ga Gago.”

<sup>78</sup> Gomme A re, “Ke tla go etela. Ke ya go go etela.” Le bona lešala mong leo, yo Motee, go ya ka tshephišo ye A e dirilego. Yoo e be e le Modimo! O rile, “Ke ya go go etela.”

<sup>79</sup> Gomme Sarah, (ka tsela ye e lego gore re tla e kwišiša) o ile a segela godimo matsogo a hemepe, go yena mong, o ile a re, “Nna, mokgekolo, lekgolo la mengwaga ka bokgale, morena wa ka” (e bego e le Abraham) “a tšofetše le yena, o fetile nako ya bophelo bja seo bjalo ka setšhabana se seswa.” A re, “Ka baka la eng, re ka se kgone go ba le mantswikinyane ka mokgwa woo gape, ke tšofetše le yena o tšofetše.” Gomme a re, “Re ka se kgone go ba le seo.” Gomme a re, “Bjang? Dilo tše di ka se kgone go ba!”

<sup>80</sup> Gomme mo—Monna (Modimo nameng ya motho) a re, “Ka baka la eng Sarah a segile le go kamaka, a re a bolela dilo tše?” Ka tenteng, ka morago ga Gagwe.

<sup>81</sup> Bjale hlokomelang, ge bjo e se bodiredi bjo bo swanago bjo Jesu Kriste a bilego nabjo! O ile a lebelela ntle godimo ga batheeletši gomme a bona dikgopolo tša bona. A botša Petro gore o be a le mang le gore leina la tatagwe e be e le mang. A botša Nathanaele.

<sup>82</sup> A botša mosadi sedibeng, ge a rile. . . O rile, “Eya o Nkgele seno,” goba “Ntlišetše seno.”

<sup>83</sup> O ile a re, “Mohlomphegi, ga se setlwaedi go Wena go bolela le. . .lena Bajuda go bolela le Basamaria. Ga re na le ditirišano mongwe go yo mongwe.”

<sup>84</sup> A re, “Eupša ge nkabe o tseba Yo o bolelago le yena, nkabe o kgopela Nna seno.” Poledišano e ile ya ya pele. A re, “Sepela go tšea monna wa gago gomme le tile fa.”

A re, “Ga ke na le monna.”

A re, “O boletše gabotse, ka gore o bile le ba bahlano.”

A re, “Mohlomphegi!”

<sup>85</sup> Lebelela phapano gare ga seo le bona—gomme bona baprista ba letšatši leo, khantshela yela e phelago ka leutung la letšatši le lengwe. Ba rile, “Se ke diabololo!” Ba be ba swanetše go araba phuthego ya bona ka selo se sengwe, ka baka la gore e be e nyaka yeo.

<sup>86</sup> Eupša na mosadi yo monnyane yo wa go šokiša, Peu yela e kgethetšwegopele e robetšego ka pelong ya gagwe. . .O be a babja gomme a lapišetšwe ke selo seo, o be a ile ka setereteng bjalo ka seotswa. Eupša ge a bona Seo, o ile a re, “Mohlomphegi, ke a bona gore O Moporofeta. Ga se rake ra ba le yo motee lebaka la makgolonne a mengwaga, gomme re a botšwa gore ge Mesia a etla tše ke dilo tše A tlogo go di dira.” Oo, nna! Peu yela e robetšego fao e ile ya tabogela bophelong! Ka baka le eng? Le be le sa nyake go hlathollwa.

<sup>87</sup> Jesu o rile, “Ke nna Yo a bolelago le wena.” Leo le be le sa nyake go hlathollwa. O dirile mohlolo gomme a paka gore O be a le Mesia yoo, amene, gomme a bea bohlatse tlwa bja se Modimo a se tshepišitšego (“Morena Modimo wa lena o tla tsoša Moporofeta wa go swana le nna,” go boletše bjalo Moshe). Seo e be e le eng? Go hlatsela Lengwalo!

<sup>88</sup> A kitimela ka toropongkgolo, gomme a re, “Tlang, le bone Monna Yo a mpoditšego dilo tše ke di dirilego. A yo ga se yena Kriste? A yo ga se Yena? O mpoditše tše ke di dirilego.”

<sup>89</sup> Bjale elang hloko, Jesu, e bile Yena godimo kua ka go Monna yola a bego a na le magetla a Gagwe a retologetšego tente gomme a bolela se Sarah a bego a nagana ka sona ka gare ga tente.

<sup>90</sup> Lentšu la Modimo le re, ka go Baheberu, ya 4 tema, gore. . .O bolela se, “Lentšu la Modimo ke le le maatla kudu gomme le bogalegale go feta tšhoša ya magale mabedi, le a ripa la aroganya moko wa marapo, gomme ke molekodi wa dikgopolo le maikemišetšo a pelo.” Ke Lentšu! Gomme nako ye nngwe le ye nngwe ge moporofeta a be a etla, o be a etla le Lentšu, gomme o be a le Lentšu la lebaka leo. Gomme le dirile eng? Moporofeti yo a bego a lekola dikgopolo tše di bego di le ka pelong.

<sup>91</sup> Le e dirile ka go Jesu Kriste ka baka la gore O be a le botlalo bja Lentšu.

92 Gomme Jesu o rile, “Bjalo ka ge go bile bjalo ka matsatšing a Sodoma, ka fao go tla ba bjalo ka go tlang ga Morwa wa motho.” Moya wa Modimo o tla tla godimo ga lefase ka sebopego sa batho, Modimo a bonagatšwa ka nameng ya motho (Amene! A le a e bona?), gomme o tla dira selo se se swanago se Modimo a se dirilego ka nameng ya motho ka Sodoma. Elelwang, ba be ba letetše morwa yo a tshephišitšwego. Gomme, thwi ka morago ga seo, morwa yo a tshephišitšwego o ile a tla. Leo e bile leswao la mafelelo le Sodoma le sehlopha sa Abraham ba se bonego pele morwa yo a tshephišitšwego a fihla. A le etše seo hloko? Gomme bjale Kereke ya semoya e tlile iring yeo.

93 Yo mongwe o rile, “Ngwanešu Branham, a o boletše gore ‘yoo e be e le Modimo?’”

94 Beibele e rile E be e le Modimo! Ga E nyake go hlathollwa. Ke Elohim. Seo ke se Abraham a Mmiditšego sona. Mmadi yo mongwe le yo mongwe wa Beibele o tseba seo. *Elohim*, “yo Motee yo a lekanetšego moka.” O be a le wa Mathomo, wa Mafelelo; Mathomo, Mafelelo. Elohim! Abraham o Mmiditše “Elohim.” Modimo (ka ditlhakakgolo ka Seheberu), Elohim; go no swana le mathomong, “Modimo,” Elohim.

95 O be a le Elohim a bonagaditšwe nameng ya motho, a apere diaparo tša batho, a eja dijo tša batho. Amene! Leswao la gore ka matsatšing a bofelo Modimo o tla tšwelela gape magareng ga batho ba Gagwe ka nameng ya motho! Amene! Jesu o rile, “Mediro ye Ke e dirago le tla e dira le lena. Gomme bjalo ka ge go bile bjalo ka matsatšing a Sodoma, ka fao go tla ba bjalo ka go tlang ga Morwa wa motho.” Amene! Seo ga se nyake go hlathollwa; se nyaka ponagatšo, seo ke se se e nyakago. Amene. A le dumela seo?

A re kobeng dihlogo tša rena.

96 Tate wa rena wa Legodimong, re neela go Wena tshephišo ya Gago bošegong bjo ya gore O boletše dilo tše. O di tšhephišitše. Fao ga go yo motee yo a ka kgonago go dira gore Lentšu la Gago le phele ge e se Wena. O rile, “Fao a go be seetša,” gomme fao gwa ba seetša. Ga go le yo motee a swanetšego go hlatholla seo, se bonagaditšwe.

97 Bjalo ka ge re tsopotše Jesaya, moporofeta, “Kgarebe e tla ima,” o dirile; ga e nyake ponagatšo ye e itšego, o e dirile. Seo ke se se diregilego.

98 O rile, ge A etla O tla belegelwa Bethlehema, “Ka ntle ga Bethlehema, Judea. A ga o yo monnyanenyanyane magareng ga ka moka magoši a Juda, wa Israele? Eupša go wena go tla tšwa Mmuši wa batho ba Ka.”

99 Dilo tše A tlogo go di dira, se A tlogo go se llela sefapanong, ka fao A tlogo go ahlolwa, ba hlabile maoto a Gagwe le diatla tša Gagwe; “O gobaditšwe ka baka la dikarogo

tša rena, gomme o tlapirigantšwe ka baka la makgopo a rena; kotlo ya khutšo ya rena e godimo ga Gagwe; ka megogoma ya Gagwe re fodišitšwe.”

<sup>100</sup> Ka fao Dafida a rilego, “Nka seke ka tlogela soulo ya Gagwe ka heleng, le gona Nka se tlogele Mokgethwa wa Ka yo Motee a bona go bola.” Gomme ka letšatši la boraro, pele diiri tše masomešupa pedi di kgona go tla ka gare go bodiša mmele wa Gagwe, Lentšu la Modimo le rile, “O tla tsoga.” (Ba ile ba re ba utswitše mmele wa Gagwe; ba sa se dumela.) Eupša re a dumela, Morena, Lentšu la Gago! Le ile la bonagatšwa. Jesu Kriste o tsogile gomme A re, “Ke tla . . . Bonang, Ke na le lena ka mehla, le go fihla bofelong bja lefase.”

<sup>101</sup> Re a dumela gore O fa bošegong bjo. Re a dumela gore O sa no ba Jesu Kriste ka botlalo bošegong, bjo fa, go no swana le ka fao O bego o le. Gomme O lebeletše feela mahlo, matsogo, maoto, molomo, disoulo, mebele, ye O ka kgonago go e šomiša go bonagatša Bowena. Modimo, re hlwekiše bošegong bjo, gore re tle re bone Jesu Kriste yo a phelago a phela magareng ga rena. A nke A tle! Gona go tla tla go phethega, bjalo ka tlala ya Bagerika bale ba ba tlilego letšatši lela, gomme ba re, “Mohlomphegi, re rata go bona Jesu.” Gomme ba ile ba Mmona. Oo, ke lethabo mang le ba swanetšego go ba ba bile le lona ge ba lebelela godimo ga Gagwe!

<sup>102</sup> Modimo, O a swana lehono. Gomme O tshephišitše gore ge re swarwa ke tlala re tla kgona go Go bona. “Lebakanyana le lennyane, gomme lefase le ka se Mpone” (yo a sa dumelego); “eupša lena le tla Mpona, ka gore Ke tla ba le lena, le ka go lena, go fihla bofelong bja lefase.” Re a tseba gore O yo a swanago maabane, lehono, le ka gosafelego.

<sup>103</sup> Morena, Mantšu a boletšwe, go ngwadilwe, bjale a nke e dirwe, bakeng sa Letago la Modimo, go laetša gore O boloka Lentšu la Gagwe. Amene. Modimo a le šegofatše.

<sup>104</sup> Ke ya go bitša mothalo wa thapelo. Ke a dumela Billy o boletše gore o file ntle dikarata tša thapelo, tee go fihla ka lekgolo, goba selo se sengwe go swana le seo. Ga a gona fa feela bjale. A . . . Na nomoro ya karata ya thapelo ke eng. . . . Yo mongwe lebelela ka morago ga gago ga ya gago. . . . E tla—e tla ba nomoro le—le tlhaka (A, B, C, D, goba. . . .). Ke eng yona, A? Ka moka gabotse.

<sup>105</sup> A re beng le A, nomoro tee, pedi, tharo, nne, tlhano. E nong go thoma go emelela ka mokgwa wo. A, nomoro tee, nomoro pedi, nomoro tharo, nomoro nne. Nne, ga se ka e bona e emelela. Nomoro ya thapelo nne. Tee, pedi, tharo. Thapelo. . . . Mohlomongwe ga ba kgone go emelela. Ge ba sa kgone, yo mongwe lebelela karata ya moagišane wa gago, a ka no ba a na le karata gomme a sa kgone go emelela. Ka pela bjale. Šele yona, nne. Tlhano, karata ya thapelo nomoro tlhano.



Tshela, šupa, seswai, senyane, lesome, lesometee, lesomepedi. E nong go thoma go tla godimo fa bjale ge dinomoro tša lena di bitšwa. Nomoro tee, pedi, tharo, e nong go tla thwi ntle ka tsela ye. Karata ya thapelo nomoro tee, pedi, tharo, nne, tlhano, tshela, šupa, seswai, senyane, lesome, lesometee, e nong go tšea mafelo a lena. Lesometee, lesomepedi, lesometharo, lesomenne, lesometlhano, lesometshela, lesomešupa, lesomeseswai, lesomesenyane, masomepedi, masomepeditee, masomepedi pedi, masomepedi tharo, masomepedi nne, masomepedi tlhano. Go na le yo mongwe a sa kgonego. . .

106 Ke bona monna yo moswa ka setulong sa mabile morago kua. Ge nomoro ya gago e beditšwe, morwa, gomme—gomme ge o sa kgone go ema. . . go lokile, e no swara sa gago, re tla bona gore o fihla fa. Le a bona?

107 Ke ba bakae ka fa ba ba se nago karata ya thapelo gomme go le bjalo le a babja? A re boneng diatla tša lena, mo gohle. Thwi fa, seo ke therešo, beang diatla tša lena godimo. A le a dumela? Ge ba sa ba beakananya mmogo, a le dumela Se, gore O a swana maabane le ka gosafelego? Ke ba bakae? Hlokomela badiredi ba; a Lengwalo ga le re lehono, baena, gore Ke Moprista yo Mogolo yo a kgonago go kgwathwa ke dikwi tša mabofokodi a rena? A seo se lokile? Ke ba bakae ba ba dumelago seo, emiša seatla sa gago? Ke Moprista yo Mogolo yo a kgonago go kgwathwa ke dikwi tša mafokodi a rena.

108 Gona ge Beibele e re, “O sa swana maabane le ka gosafelego,” ke ba bakae ba dumelago seo? Ka gona O tla dira bjang lehono? O tla dira go swana le ka fao A dirilego maabane. A seo ke therešo? O kae bošegong bjo? O dutše ka letsogong la go ja la Bogoši, mmele wa Gagwe; Moya wo Mokgethwa o fa ka moagong, go Mo dira gore a tsebje.

109 Elang hloko, bjale lebelelang. Go diregile eng ge yo mongwe a kgwathile kobo ya Gagwe morago kua, mosadi letšatši le lengwe? O be a se na le karata ya thapelo, re ka rialo, eupša a kgwatha seaparo sa Gagwe. Gomme ge a kgwathile seaparo sa Gagwe, Jesu a retologa go dikologa gomme a re, “Ke mang yo a Nkgwathilego?”

110 Petro a Mo kgalema, gomme a re, “Ke baka la eng, Morena, seo se no se kwagale se na le tlhaologanyo. Ka baka la eng, yo mongwe le yo mongwe o leka go Go kgwatha. Ka baka la eng o re, ‘Ke mang yo a Nkgwathilego?’”

111 A re, “Eupša Ke a kwa gore Ke a fokola.” Ke ba bakae ba tsebago seo? *Bokwala*, bo ra gore “maatla,” bo tšwele go Nna. “Ke ba yo a fokolago, yo mongwe o Nkgwathile ka mohuta wo o fapanego wa kgwatho.” Gomme A retologa go dikologa gomme a lebelela go batheeletši go fihla A hwetša kanala yeo ya tumelo.

112 Yo mongwe le yo mongwe o be a bea matsogo a bona go Mo dikologa, “O Rabi, re dumela go Wena,” le ka moka se.

113 Eupša fao go be go le yo mongwe ka nnete a Le dumetšego. Gomme o ile a kgwatha kobo ya Gagwe gomme a dumela gore o fodile, ka baka la gore o boletše ka pelong ya gagwe gore ge a be a ka kgona go se dira seo ke se se bego se tla direga.

114 A retologa go dikologa gomme a lebelela godimo ga batheeletši go fihla A mo hweditše, gomme A re... a mmošša gore tšhologo ya gagwe ya madi e eme gomme o fodišitšwe. A seo ke therešo? Bjale, yeo ke tsela ye A e dirilego, ka batheeletšing ba batho.

115 Bjale, ke tleleima gore Yena ga se a hwa, O phela kudu lehono go swana le ka fao A kilego a ba ka gona. Gomme Beibele e rile, Jesu o rile, ka Boyena, “Bjalo ka ge go bile bjalo ka matšatšing a Sodoma, ka fao go tla ba bjalo ka go tlang ga Morwa wa motho.”

116 Bjale lebelelang, ga go tshwenye gore ke mohuta mang wa mpho ye Modimo a nago le yona godimo fa, fao go swanetše go ba ye tee tlase fao, gape, go arabela go yona. O ile a ya ka toropongkgolo, Beibele e rile, “Fao go bile dilo tše ntši A sego a kgona go di dira ka baka la go se dumele ga bona.” A seo ke therešo? Selo se se swanago lehono. Le swanetše go Mo dumela. Le swanetše go no Mo dumela. Yeo ke tsela e nnoši le ka kgonago.

117 A mothalo wa thapelo o lokile? Bjale, yo mongwe le yo mongwe hlomphang e ka ba metsotso ye lesome feela. Ga ke tsebe ge eba ke tla fihla go kgabola fao, ke na le e ka ba masomepedi tlhano goba masometharo ke eme fao. Eupša bjale, ka mothalong wa thapelo, yo mongwe le yo mongwe wa lena ntle fao ka mothalong wa thapelo yo a tsebago gore ke mosetsebe go wena, gomme ga ke tsebe selo ka wena, emišetša seatla sa gago godimo. Yo mongwe le yo mongwe ka mothalong wa thapelo.

118 Bjale ntle ka batheeletšing, yo a tsebago gore ga ke tsebe selo ka wena, emišetša seatla sa gago godimo. Bjale, bjale, sese se ke lekago go se bolela, mogwera, le a bona. Bjale, še yona. Ka moka badiredi ba godimo fa sefaleng. Gomme Kriste o dirile tshepišo ye. Le a bona, go ngwadilwe. Le be le swanetše go tla go phethagala neng? Ka matšatšing a bofelo, feela pele ga go Tla ga Morena. A seo ke therešo? Le be le swanetše go tla go phethagala nako yeo.

119 Bjale, leo ke Lentšu le le porofetilwego lehono. E sego seetša sa Luther; e sego seetša sa Wesley; gomme le bile e sego seetša sa Pentecost. Se ile godimo tseleng bjale. Bjale, Luther ka moka o gabotse; Methodist ka moka e gabotse; Baptist ka moka e gabotse; ka moka ga tšona, Pentecost, e gabotse. Fao go na le ka moka mehuta ba dutše fa bošegong bjo. Ga se—ga se—ga se batho ka bobona. Go ka reng ge. . .

120 O be o ka se kgone go botša Momethodist selo se se itšego ka Luther, ka baka la gore o be a dumela go tlhwekišo gomme Luther ga a dire. Le a bona?

121 O ka se tsoge wa botša Mopentecost gore “tlhwekišo ke ka moka ga yona,” o bone pušetšo ya dimpho. Ga a ye go dumela seo. Aowa, o na le se se fetago seo. Le a bona? Gomme leo ke lebaka la kereke la mafelelo le re bilego le lona, gomme Beibele e bolela gore fao go ka se sa ba mabaka a kereke gape.

122 Eupša fao go swanetše go ba kgobokano ya batho, le a bona, gomme ke rena ba. Bjale, elelwang, leswao la mafelelo. A rena batho re lebeletše morwa yo a tshephišitšwego? Emišetša seatla sa gago godimo. A o a dumela gore o Peu ya Abraham ka go ba ka go Kriste? Emišetša seatla sa gago godimo. Ka gona, Peu ya Abraham, amogela leswao la gago! Ga e ntle ka Babele, ga e ntle kua lefaseng la dikereke tša maina. E fa magareng ga lena, bao ba sego ka tlhakahlakanong yela ntle kua. Ba a le dumela!

123 Šo mosadi, ke mosetsebje ka go felela go nna, felotsoko tikologong ya mengwaga ye e swanago. Ga se kake ka bona mosadi ka bophelong bja ka. Ge nkabe ke kgona go fodiša mosadi ke be nka e dira, ge a babja. Ga ke tsebe selo ka yena. A le mmone a emiša seatla sa gagwe metsotso e se mekae ya go feta? Ga—ga se kake ka mmona. E no ba mosadi o eme fale.

124 Lehono ba tlile tlase fa gomme ba tliša mokgobo wa dikarata tša thapelo, ba di hlakanya ka moka gomme ba di fa batho. Yo motee o hweditše nomoro tee fa, le nomoro ya lesome morago kua, nomoro ya lesometlhano, nomoro ya šupa, nomoro . . . feela ka mokgwa woo. Ka moka di hlakahlakane, thwi pele ga lena, letšatši le lengwe le le lengwe. Gomme ge di bitšwa, di no bitšwa ka moka go dikologa go tšwa mo gohle. Le a bona? Gomme, bjale, ga wa swanela le bile go ba le karata ya thapelo, e no dula fao gomme o dumela. Ka baka la eng o sa kgone . . .

125 Itshobe ka bowena, bošegong bjo, hwetša iri ye re phelago ka go yona. Le a bona? Bjale, go no ba go le kgauswi le go fela, le gona, mogwera. Feela kgauswi le go fela!

126 Bjale, ge Modimo wa Abraham a tsoitše Jesu Kriste go tšwa bahung, gomme Jesu yoo o tshephišitše gore ka matšatšing a bofelo maswao a a swanago ao Abraham . . . Morongwa yola (e bego e le Modimo ka nameng ya motho) a go a dira pele ga Abraham, feela pele morwa yo a tshephišitšwego a fihla, Jesu o rile selo se se swanago se be se tla direga lehonno.

127 Bjale, re bona diathomo le dikereke tša maina, gomme ka moka tšeo, le tlhakahlakano ye ba lego ka go yona. Re bona Billy Graham tlase kua, le Oral Roberts, le bona ka moka batho ntle kua; motseta wa Pentecost le motseta wa kereke ya leina tlase kua, re bona ka moka seo se eya pele, se rwele leswao. Billy Graham, moithutamodimo go fihla go khutlo, seo kereke ya leina e dumelago go sona. Oral Roberts, mofodiši go fihla go khutlo, feela tlwa se Pentecost . . .

128 Eupša lebelelang fa, fao go na le selo se sengwe gape se se tshephišitšwego Peu ya Abraham. Šebale ba tlase magareng ga

tšona dikereke tša maina; fao go na le selo se sengwe ka *ntle* ga dikereke tša maina se swanetšego go direga, se kgoboketša batho. Re tla e tlogela fao go fihla gosasa bošego.

<sup>129</sup> Hlokomelang, ga ke tsebe mosadi yola. Ke tla retollela magetla a ka go yena. Ge Morena Modimo a ka bolela selo se sengwe go mosadi yola, mohlomongwe ke—ke sa ka lapeng, mohlomongwe ke sa ditšhelete, mohlomongwe ke go babja; ga ke tsebe. O tla tseba ge eba ke therešo goba aowa.

<sup>130</sup> Ge A ka dira selo se se swanago bošegong bjo le se A se dirilego nako yela, a o tla dumela Modimo yo Jesu Kriste a tshepišitšego gore o tla ba fa matšatšing a bofelo? Ke ba bakae ba ba dumelago gore re phela bjalo ka Sodoma, ge lefase lohle le ile ka seemong sa Sodoma? Ke ba bakae ba ba dumelago gore se ke le boditšego sona bošegong bjo ke Therešo? Gona, bana le Peu ya Abraham, dumelang Modimo!

<sup>131</sup> Bjale, ka fao e tla se ntšhetša ntle ka monaganong wa gago se ke lekago go bolela selo se sengwe go mosadi, ke mo lebeletše ka sefahlegong, goba go hwetša dilo ka moka ka go bala mogopolo goba eng kapa eng ye o nyakago go e tseba. Yo mongwe yo a tsebago ka go bala mogopolo o swanetše go ba le sekwi se sekaonekaone go feta seo. Le a bona? Le a bona? A o kile wa bona sebala mogopolo se rera Ebangedi? A o kile wa bona ramemoya a rera Ebangedi, a dira maswao le dimaka, a bolela Jesu Kriste go swana? Aowa.

<sup>132</sup> Le a bona, e noba . . . ke monagano wa motho. Le a bona, ba fufetše. A le a dumela gore ba ka kgona go fufala? Beibele e boletše gore ba tla ba. A seo ke therešo? “Ba go tšewa ke maikutlo, baikgogomoši, ba go rata maipshino go feta go ba ba go rata Modimo, baroba kwano, baphari, ba go se itshware, manaba a babolo, ba go ba le sebopego sa bomodimo, eupša ba gana Maatla a bjana.”

<sup>133</sup> A Jesu ga se a bolela, ka go Mokgethwa Mateo 24:24, gore memoya ye mebedi ka matšatšing a mafelelo gabotse e ka fora le bona Bakgethiwa, ge go be go kgonega? Eupša ga go kgonege. Ba be ba le ka megopolong ya Modimo mathomong, gomme ke karolo ya Modimo.

<sup>134</sup> Bjale, Modimo wa Abraham, Isaka, le Jakobo, a go tsebje bošegong bjo ke bolela Therešo ka Wena. Ke Wena, Morena. Ka go kokobela a nke bahlanka ba Gago ba kgone go tloša megopolo ya bona go tloga tseleng, gore O kgone go šomišetša mebele ya rena Letago la Gago. Ka la Jesu Leina, Morwa wa Modimo. Amene.

<sup>135</sup> Na mpho ke eng? E sego selo se sengwe se o se tšeago gomme wa se rema wa se retolla. Aowa, aowa. Ke go tseba ka fao o ka intšhetšago ka bowena ka ntle ga tsela gore Modimo a kgone go go šomiša. Mpho e no ba go intšhetša ka bowena ka ntle, ka gona Modimo o a e šomiša.

<sup>136</sup> Mohumagadi ka morago ga ka o ya go hwa thwi ge a sa fodišwe. Mohumagadi ka morago o sa tšwa go rapelelwa ke monna yo mongwe, e sego kgale. O na le kankere. Kankere e ka letsweleng la gagwe gomme gape le ka maswafong a gagwe. Gomme o sa tšwa go rapelelwa e sego kgale, gomme o leka go e amogela ka tumelo gore o fodile. Ke GO RIALO MORENA! A seo ke therešo, mohumagadi? [Mohumagadi o re, “Eye, nnete ke therešo.”—Mor.] Ge e le yona, šišinyetša—šišinyetša seatla sa gago go batheeletši. Modimo wa Abraham o sa phela! Ka moka gabotse, sepela o dumele se o se dumelago gomme o tla ba gabotse. Amene.

Le a dumela? Le re, “Go reng ka batheeletši?”

<sup>137</sup> Mosadi yo a dutšego fa le yena...ka mafelelong a mothaladi, mohumagadi wa bobedi thwi fao. Ge ke retologa go dikologa feela ka fao ke bone selo se sengwe, selo go dikologa letsogo la gagwe, go pompa kgatelelo ya madi. O na le kgatelelo ya godimo ya madi. A seo ke therešo, mohumagadi? Emišetša seatla sa gago godimo. Ge o dumela, kgatelelo ya gago ya madi e tla ya fase. Modimo wa Abraham o sa le lefelong la tiragalo. O feela tlwa se a bego a le sona, Lentšu la Modimo la letšatši le!

<sup>138</sup> O dira bjang? O a dumela bjale? Eba le tumelo go Modimo! Go bonala o ka re e no ba ngwana. Modimo o tseba pelo ya gago, mohumagadi yo moswa, ga ke e tsebe. A o a dumela gore Modimo o kgona go utolla go nna gore phošo ke eng? A o tla Mo dumela ge nka dira? Ga se ya gago, ke ya yo mongwe gape, e lego ngwaneno. Gomme o seriase kudu gomme o ka toropongkgolo lebowa la fa, Tulare. Gomme o ka sepetlele, gomme o na le kankere ya madi, gomme dingaka di mo hlobogile gore a hwe. Fao ga go na le dikholofelo le gannyane. Seo ke therešo. A o a dumela? [Mohumagadi, a lla, o re, “Eye.”—Mor.] Ka moka gabotse. A o na le eng ka seatleng sa gago? Tšea seo gomme o se ale godimo ga gagwe. Gomme o seke wa se kamaka. Dumela! Amene.

<sup>139</sup> A o a dumela? Ga se kake ka bona mohumagadi bophelong bja ka. Eupša Modimo o dula e le Modimo! Bjale, mpošeng a motho a ka kgona go dira seo? Ga se modirelo wa motho go e dira. Ke Modimo yo Jesu Kriste a tshephišitšego gore o tla ba fa ka matšatšing a mafelelo gomme o tla iponagatša ka Boyena (pele ga Peu ya Abraham feela) bjalo ka ge go bile bjalo matšatšing a Sodoma.

<sup>140</sup> Bjale fa, ga ke tsebe mohumagadi, re basetsebje mongwe go mongwe, ke a thanka ke kopano ya rena ya mathomo bophelong. A o a ntumela go ba mohlanka wa Gagwe? [Mohumagadi o re, “Eye.”—Mor.] A o dumela le go ba Lentšu? [“Eye.”] Gomme o a tseba gore ge...Lentšu le e sale molekodi wa megopolo le maikemišetšo a pelo. A seo ke therešo? [“Seo

ke therešo.”] Lentšu ke Mofodiši, le lona, ge o ka kgona go Le dumela. O a dira. O pipilwe ke morithi, le wena, ke morithi wo moso. Ke kankere. Gomme a o a dumela gore Modimo a ka kgona go mpotša fao kankere yeo e lego gona? E ka maleng a fasefase, ka fao ngaka o a bolela. A o a dumela bjale gore o tla fodišwa? [“Amene.”] Tloga, gomme o seke wa kamaka le gannyane, gomme Modimo o tla go dira o loke. Amene.

<sup>141</sup> Le a dumela, yo mongwe le yo mongwe? Feela tlwa ke seo A tshephišitšego go se dira! Ebang le tumelo go Modimo, le seke la kamaka.

<sup>142</sup> Ke rena basetsebane mongwe go yo mongwe. Ga ke go tsebe. Ge re le basetsebane, a nke batheeletši ba tsebe se, re swara diatla tša rena. Ga se kake ka bona mosadi bophelong bja ka.

<sup>143</sup> A le a dumela ntle fao? Le a dumela gore ke Jesu Kriste? Ke eng? Ke Lentšu la Gagwe. Ge batho ba ba Le gana, ga ba gane monna, ba gana Lentšu. Ke Lentšu le le bego le le ka ntle, le sa kgone go tsena ka gare.

<sup>144</sup> Bjale, mohumagadi ke mosetsebje go nna. Ga se kake ka mmona ka bophelong bja ka. Modimo ke Mofodiši. E ka no se be bakeng sa phodišo, e ka no ba se sengwe gape, eupša ge Modimo a ka ntlhathollela gore bothata bja gago ke eng, a o tla ntumela? Selo sa pele o nyakago se rapelelwa, ke, o na le tsebe ye mpe. E tee ya ditsebe tša gago, ga o kgone go kwa ka ntle le yona. Seo se lokile. Seo ke therešo. Gomme ka gona o na le mokgwa, gomme o nyaka go fediša mokgwa woo, ke go kgoga disekerete. Bea monwana wa gago ka tsebeng ye e lokilego ya gago, ka moka gabotse, tsebe ya gago ye e lokilego. Ka moka gabotse. Bjale dumela Modimo gomme eya ka tsela ya gago, gomme o seke. . . gomme o ka se sa kgoga disekerete gape ge o ka dumela. Tloga, gomme Morena a go šegofatše.

Le bona se se diregilego. A ga se Yena wa nnete?

<sup>145</sup> Ga ke go tsebe, re basetsebane mongwe go yo mongwe. Ga se kake ka go bona ka bophelong bja ka, eupša Modimo o a go tseba. Ge Modimo a ka kgona go mpotša selo se sengwe ka wena, a o tla dumela?

<sup>146</sup> A batheeletši bohle ba tla dumela? A yo mongwe ntle fao o tseba mosadi? A yo mongwe ka batheeletšing o tseba mosadi? Ka moka gabotse, o tseba ge eba se ke therešo goba aowa. Se se swanetše go e rarolla. Se se swanetše go bolela therešo.

<sup>147</sup> Bjale le kgona go bona se se diregilego feela metsotsong e se mekae ya mafelelo. Le a bona? E no ba. . . Ke a thekesela. Le a bona? E no ba selo se sengwe le se sengwe se e ba sefoku go nna. Le a bona, Ke go lekola. Le a bona, Ke Moya wo Mokgethwa. Ga se nna. Ke Lentšu le le tshephišitšwego letšatši le. Ga se la ke la ba gona go tloga matšatšing a baapostola, ga se la ke la ba gona. Eupša fao le bego le le gona, “Ka go feela pele ga go tla ga Morwa wa motho. Bjalo ka ge go bile bjalo ka

matšatšing a Loto, ka fao go tla ba bjalo ka go tleng ga Morwa wa motho.” Ba go se dumele ga ba Le dumele. Ga se ba letelwa go Le dumela. Eupša badumedi ba a Le dumela!

<sup>148</sup> Bjale, ge Moya wo Mokgethwa o ka utolla se, ke ba bakae ba ba tla dumelago ka pelo ya gago ka moka, o tla emiša seatla sa gago?

<sup>149</sup> O bile le tshenyego. O bile le kotsi ya koloi, gomme e gogile marapo a mokolo go tlemologa ka molaleng wa gago. Gape o bile le pshio e gogilwe go tlemologa. Seo ke therešo, a ga se yona? [Mosadi o re, “Eye, mohlomphegi.”—Mor.] O a dumela? [“Eye, mohlomphegi.”] O tla ba ka moka gabotse. Tumišang Morena.

<sup>150</sup> O a dumela gore Modimo o fodiša bothata bja pshio? Gona eya pele gomme o amogele phodišo ya gago.

<sup>151</sup> Etle, mohumagadi. Lebelela ka tsela ye. O a dumela gore Modimo o fodiša bothata bja pelo? Ka moka gabotse, eya ka tsela ya gago gomme o dumele, gomme pelo ya gago e tla ba ka moka gabotse.

<sup>152</sup> Etle fa. O a dumela gore Modimo o kgona go fodiša mokokotlo, a go dira o loke? Eya pele gomme o e dumele gona.

E no dumela Modimo, seo ke ka moka o swanetšego go se dira!

<sup>153</sup> Etle, mohumagadi. O a dumela gore Modimo o fodiša bothata bja teng? Tloga, eja selalelo sa gago, dumela ka pelo ya gago ka moka.

<sup>154</sup> Etle. O a dumela gore Modimo o kgona go fodiša atheraithisi? Gona tloga, dumela, gomme o dire...gomme Modimo o tla go dira o loke.

<sup>155</sup> Ka moka gabotse, etla. O dumela ka pelo ya gago ka moka? O a dumela? Atheraithisi, gape. A o a dumela gore Modimo a ka kgona go go dira o loke? Tloga o ye pele, Le dumele, e re “Ke a Go leboga, Morena.”

Ke ba bakae ba ba dumelago ntle fao? A le a dumela?

<sup>156</sup> Mohumagadi yo a dutšego fa ka roko ye khubedu, a emišeditšego seatla sa gagwe godimo thwi fa, a tlaišegago ka kgatelelo ya godimo ya madi. O a dumela gore Modimo a ka go dira o loke? O a dira? Ka moka gabotse. Bea diatla tša gago godimo ga mohumagadi yola kgauswi le wena tlase fao, gomme o mmoše gore lentšu la gagwe le ya go ba ka moka gabotse. Amene.

Fao šeleo. Amene. A le a dumela? Ebang le tumelo!

<sup>157</sup> Fa go na le monna o dutše fa, o na le go tšhologa madi. A o a dumela, mohlomphegi, yo a dutšego thwi fa? Eye, o na le go tšhologa madi. A o a dumela gore e fodile?

<sup>158</sup> Mohumagadi yo a lego kgauswi le wena o na le go tšhologa madi le yena, gomme o na le bothata bja mokokotlo. O a dumela gore Modimo o ya go go fodiša? O a dira? Emiša seatla sa gago o e amogele. Dumela.

159 Mohumagadi yo kgauswi le wena o na le bothata ka maoto a gagwe le letheka la gagwe. A o a dumela gore seo ke therešo, mohumagadi? O a dumela gore o tla fodišwa? Go lokile, emišetša seatla sa gago godimo, e re, “Ke a e amogela.”

160 Ka moka gabotse, mohumagadi kgauswi le yena o na le tshwaetšo. O a dumela gore Modimo o tla fodiša tshwaetšo, mohumagadi yo moswa a rwelego digalase? Emišetša seatla sa gago godimo, e re, “Ke a amogela.” Ka moka gabotse, e amogele.

161 Mohumagadi kgauswi le yena o na le bothata bja pshio. O a dumela gore Modimo o tla fodiša bothata bja pshio, mohumagadi? Ka moka gabotse, emišetša seatla sa gago godimo, e amogele.

162 Mosetsana yo monnyane kgauswi le yena o na le lehwa. O a dumela gore Modimo o tla fodiša lehwa fao? Emišetša seatla sa gago godimo, e amogele.

163 Ke ba bakae ba dumelago ka pelo ya gago ka moka? Gona emelelang ka maoto a lena gomme le e amogela. Emelelang ka Bogoneng bja Modimo wa Abraham, Isaka le Jakobo.

164 Leineng la Morena Jesu Kriste a nke Moya wo Mokgethwa o wele ka moagong bjale gomme o fodiše motho yo mongwe le yo mongwe ka Bogoneng bjo Bokgethwa! 

*MODIMO KE MOHLATHOLLI WA GAGWE MONG NST64-0205*

(God Is His Own Interpreter)

Molaetša wo ka Ngwanešu William Marrion Branham, mathomong o abilwe ka Seisimane ka Laboraro manthapama, Fepereware 5, 1964, ka Kern County Fairgrounds ka Bakersfield, California, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye North Sotho tlhathollo e ngwadilwe gomme ya phatlalatšwa ke Voice of God Recordings.

NORTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)